



**JUDICIAL SYSTEM MONITORING PROGRAMME  
PROGRAMA DE MONITORIZAÇÃO DO SISTEMA JUDICIAL**

***Komunikadu Imprensa***

**Períodu : Jullu 2010**

**Pubikasaun : 21 Jullu 2010**

**Komisaun A PN aprova Relatóriu Paraser ba Lei Instituisaun Memoriál no Lei  
Reparasaun**

Komisaun A Parlamentu Nasional iha loron 14 fulan Jullu 2010 aprova tiha ona relatóriu paraser ba Lei Instituisaun Memoriál no Lei Reparasaun ho votu afavor 5, kontra 2 no absteinsaun 0.

Bankada parlamentu sira ne'ebé partisipa iha diskusaun bá aprovasaun ne'e mak hanesan Sra. Fernanda Borges husi bankada PUN hanesan mós Prezidente Komisaun A, Sra.Carmelita Moniz no Sr. Natalino dos Santos husi bankada CNRT, Sra.Teresa Amaral husi bankada ASDT, Sr.Cornelio Gama alias L-7, husi bankada UNDERTIM no Sr. Aniceto Guterres no Sr. Domingos Sarmiento husi bankada Fretilin.

Deputadu Domingos Sarmiento husi bankada Fretilin deklara katak, nia vota kontra relatóriu paraser ne'e tanbá hakarak reparasaun ne'e fo prioriedade ba vítma ne'ebé luta ba libertasaun no vítma seluk bele hetan deit apoiu sosial husi governu.

Entertantu deputadu L-7 dehan, nia vota afavor tanbá mekanismu reparasaun ne'e fo benefisia ba vítma hotu, liu-liu ba sira ne'ebé vulneravel tanbá konsekuensia funu. Deklarasaun hanesan mós hato'o husi deputadu Natalino dos Santos katak nia vota afavor iha komisaun, atu fo onra ba vítma sira maibé bele mós muda posisaun de votus iha debate plenária kuandu nesesariu.

Luis de Oliveira Sampaio, Direitór JSMP, kongratula esforsu membru parlamentu sira nian maski iha diferensia politika maibé iha konsensia hamutuk atu hatutan prinsípiu implementasaun relatóriu final *Chega* ka rekomendasaun Komisaun Akollimentu, Verdade no Rekonsiliaun (CAVR) inklui relatóriu no rekomendasaun Komisaun Verdade no Amizade (CVA) nian. Tanbá ne'e JSMP enkoraza distintus no distintas deputadus Parlamentu Nasional atu kontinua lori prosesu ne'e ba iha plenariu hodi diskuti no aprova lalais antes tinan ne'e remata.

JSMP hein katak, esbosu lei rua ne'e bele fo benefisiu ba vítma vulneravel ne'ebé hetan tortura ka violasaun seluk hasoru sira nia direítu fundamental ne'ebé kauza hosi asaun ka omisaun sira ne'ebé mak viola lei internasionál direítus umanus, ka violasaun grave ba lei internasionál umanitária nian no la halo diskriminasaun ba direítus difisensia sira hanesan fo prestasaun ba servisu kuidadu saúde no rehabilitasaun ba servisu saúde mentál, akonsellamentu no servisu sosiál ba sira, inklui fo formasaun profisionál no edukasaun non formal ba sira ne'ebé la hatene lê no hakerek (alfabetizasaun) tuir alinea a), b) no c) n<sup>o</sup> 1 husi Artigu 9.<sup>o</sup> lei reparasaun haruka.

Atu hetan informasaun kle'an favor kontaktu:

Luis de Oliveira Sampaio  
Diretor Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883